

Nic. Polant.

Handigt von 5.
Konting von
Tributis
1591.

Hg

AB

50A $\frac{10}{2,35}$



[Faint, illegible handwritten text]

[Faint, illegible handwritten text]



Erster Antritt/ vnd eingang zum
Christlichen/ vnd ewigen Leben.

Von Gott beschloß

sen/ vnd Offenbaret/

Dessen Summa ist:

Das man Gottes Wort hören/
vnd bewahren soll.

Idermenniglich ganz nötig/ vnd heil-
sam Geprediget:

Von Nicolao Polanto H. Schrifft
Doctore in Eger/

Den Fünfften Sontag nach Trinitatis
Anno Clj. lxx. XCl.

Johan: 12. Cap.

Wer mich veracht/ vnd nimbt meine Wort
nicht auff/ der hat schon der ihn richtet/ das
Wort/ welches ich geredt habe / das wird in
Richten am Jüngsten Tag.

E S A I E 42. Cap:

Man prediget wol viel/ Aber sie haltens nicht/ man sagt
ihnen gnug/ Aber sie wollens nicht hören.

Gedruckt zu Jhena/ durch Doe
nat Nichtzenhan.



Dem Erbarn / Vorsichtige: vnd Wol-
weisen Johan Mymlern Bürgern vnd des
Raths in Eger: meinen günstigen Herz-
ren vnd geliebten Gevattern.

Wahre andacht / vnd Liebe zu Christo / vnd
seinem wort / sampt aller daraus folgenden
des Leibs vnd der Seelen Heyl / vnd Wolfart /
in erbietung meines gebets vnd dienst-
willigkeit zuuor.

Dangesehen das wir / freylich von
Gottes gnaden / Lehrer / vnd Diener
des worts offtermal selbst nicht wiss-
sen / vnd verstehen / in was seeligen /
vnd hohen stand vns Gott ausgesondert / vnd ge-
setzet hat / wenn zumal die prechtige / schöne
Welt vns so vbel helt / anfeindet / vnd neben dem
wort gar verachtet / So wolten vnd würden wir
vns doch vor glücklich vnd vortrefflich halten /
wenn wir nicht mehr den dz einige bey der Welt
kündten erhalten / vnd so fern mit ihr es bringen /
das si nemlich Gottes wort mit rechter / warer
andacht ohne vnterlas / vnd vberdrus hörete.

Denn traun allein an diesem ort es haf-
tet vnd anstehet / das so wenig bekerter / vnd guter
Leut auff Erden sein / vnd weil dieser vrsprung
vnd brunnen quell so gar vertreten vnd verstopfft
wird / dadurch vns doch Gott alles / vnd das e-
wige Leben / nach seinem vnwandelbaren decret
zu ertheilen beschlossen / müsse auch der gantze
flus

flus trüb vnnß vnrichtig werden. Wenn auch die gantze Welt im argen vnd ewigen todt ligt / vnd steckt / vnd ohne das wort nistier draus kommen kan: geschichts das wie ir das wort wenig hören: Also kommen ihr wenig zu Gottes vnd ihrer selbst erkenntnis.

Nun des schmerzlichen jammers will vnd kan es denn ja bey jederman nicht dahin bracht werden / das sie höreten / So befehlen wirs Gott / vnd auff seinen befehl sollen wir Diener nichts weniger fort fahren / zur zeit vnd vnzeit das wort zu predigen / das doch etliche mögen bekert vnnß herbey bracht werden. Wirdt vns ruhms genug sein an jenem tag / weñ wir nur vnfers teils nichts ermangeln lassen: da vnnß dort einen gewonnen haben.

Darumb Gönstiger Herr Gevatter / wenn ich diesen einfeltigen sermon / wie auch andere / dahin gerichtet / das solches von ihr vielen bezertiget: zu ernstlichen gehöör des worts / vnnß solcher gantz wichtigē sachē besser nach zu dencken / möchten angetrieben werden / vnd sonderlich ich von euch ein rechten ernst vnnß andacht zu Gottes wort vnd trost / ohne heuchlischen ruhm / in warheit vnd mit freuden spüre vnd verneme / hab ich nicht allein L. L. W. solchen auff ihr günstig begern schriftlich: Sondern auch andern meinē vertrauten vnd liebē zuhörern durch diesen druck wollen dienstschuldig mittheilen.

Obwol die Lehre von der ewigen wahl richtiger vnd reicher können dargethan werden

achte ich doch vor vns vnd ander einfeltige s. Ich
es genug sein/wenn man durch viel wieder rez
de vnd erklerung mehrer puncten vnd sprüche nur
perwirter wird / vnd sich zur predigt / wie ich sie
damal gehalten / weiters hinzu zuthun / vnzime
lich sein wolte.

Christus wird vnd will vnser lohn sein/
vnd genade verleyhen / das ir viel auch ohne vns
ser verstehen/sich durch regierung des Deyligen
Geistes/ eines bessern bedencken: Ungeacht aller
hinderung auff dieser mühseligen fahrt zu Chri
sto dem Fürsten des Lebens.

Dem selbigē empfele ich E. E. W. sampt
ihrigen durch seinen Geist vnd Genade in diesem
vnd andern kampff des Geistes wieder dz fleisch
zu erhalten / vnnd zu bewahren ewiglich: In
Eger den 15. Julij Anno 91.

E. E. W.

Dienstwilliger

Nicolaus Polant D.

Domine

Domine in verbo tuo laxabo rete.

Euangelium Luce 5. Cap:

Es begab sich das sich das Volck zu
Ihesu drang / zu hören das wort Got-
tes: etc.

Geliebten in Christo dem Herren /
Im Buch der Weisheit stehet gleich die Hell
abgemalt / darinnen man vnter andern heu-
len / weinen / vnd weheklagen / der Gottlo-
sen höret / das sie sich verfluchen / darumb das sie so grosse
Narren hie auff der Welt gewesen / eben in dem / das sie
sich so klug vnd oberweis sein deuchten / vnd die gerechten
neben dem wort Gottes fur ein spot vnd nartheit gehalten
haben.

Sap: 5.

Wahrber!
die verdäp-
ten am mei-
sten Plagen

Solche Narren / solt einer wol sagen / seind ge-
wislich die Jüden / zu denen kömpt Christus leibhafftig /
will sie seelig haben / vnd machen / erlösen / alle güte vnd
wolthat an Seel vnd Leib erzeigen / derenthalber er denn
bey ihnen ab vnd zu gehet / lehret / vnd thut wunder / Sihe
vmb Gottes willen / so wollen sie ihn auff solche weiß nicht
haben Gottes rath vnd willen erkennen / vnd annemen /
Sondern sind so ungehalten / töricht vnd verbittert / das
sie nicht ehe ablassen bis sie Christum todtschlagen / vnd
hinrichten.

Blindheit
der Jüden.

Hat der Teuffel jemals Leut recht zu lauter Nar-
ren gemacht / sie mit nartheit / vnd blindheit gar besessen /
So sind diese Darumb ihnen denn recht geschehen / das

sie Gott wiederumb also bekalte vnd zum schrecklichsten ge-
straffe. Vnd dieses ist zwar recht vnd war.

Zeuchlische
vnd ver-
meinte ans
dach vieler
Menschen.

Nun möchte einer weiter sagen / Wenn mehr zu
dieser zeit mich das glück solt treffen / vnd mir so gut würde
das Christus auff erden vmbginge / vnd selbst sein wol-
thaten / lauter glück / Heyl vnd Segen wolt austheilen /
vnd das ewige leben geben / Ich wolt mich warlich nicht
seumen / vnd so nerrisch sein / das ich mich etwas solte las-
sen auffhalten / Ich wolte zu Christo lauffen vnd eilen /
durch die größte not / vnd gefahr / wenn ich alles hinder
mir lassen / wenn ich durch spieße lauffen solt vnd mir ein
aug empfiere / ich wolte mich nicht wenden solches auffzu-
heben / denn wenn ich diesen Herren hette / so hette ich Ja
alles.

Nun das ist auch recht vnd warhafftig / vnd seelig
sind wir / das wir solches hören / erkennen vnd wissen. Als
lein wenn wir nur selbst nicht eben bey dem / das wir
dieses hören / Wissen / sagen vnd bekennen müssen / die
größte Narren / vnd viel grössere narren denn die Jüden
oder ander Völcker vnter der Sonnen / weren.

Christus
ist bey vns
Math: 15.
vnd 28.
Johan: 14.

Rom: 1.

Durch hö-
ren des
wortes
man zu
Christo.

Ist denn Christus vnser getrewer Immanuel nicht
auch bey vns alle tag bis zu end der Welt / mit seiner ver-
heissenen genadenreichen persönlichen gegenwart mit sei-
ner vberschwenglichen gnade / mit seinem Geist / Heyli-
gung / schutz vnd teglicher erlösung aus vnzehlichem Jam-
mer vnd not / mit seinem / vnd in seinem heylwertigen kreff-
tigen wort vnd predigampt? Freylich ist er gewiß vnd
warhafftig da / vnd will vns hie reich / vnd dort ewig seelig
machen. Darzu stehet vns thür vnd thorangel weit offen /
vnd haben einen freyen paß vnd zutritt alle tag / stunde /
vnd augenblick zu ihm / vnd allen seinen himlischen Res-
galien

galien / vnd wolthaten / durch waren brauch vnd hörung
seines worts / heylsamer busse / vnd der Sacramenten.

Ja dieses haben wir nicht allein alles reichlich /
Sondern wir werden noch darzu mit vielen tröstlichen ver-
heissungen freundlichst ermanet / vnd denn in allen sten-
den / der Vbrigkeit / Eltern / vnd Prediger / mit straff vnd
vermanung darzu genötiget / auch Gott selbst brauche das
compelle intrare / schickt eben derenthalber hie vnd an-
derswo / diese vnd jene plag vnd straff / das wir füsse gewin-
nen vnd zu ihm lauffen sollen.

Wir werde
gleich genö-
tigt zu
Christo.

Gott selbst
treibt vns

So Jemandt vnlustig vnd verdrossen vnd damit
entschuldigt sein wolt / der hat sonstens Gottes wort / vnd
wolthat / nach allem lust auff aller hand manier / in reinem
schönen druck / klein vnd gros / in den schönsten büchlein /
gebets weise / in den anmutigsten gesengen / vnd liedern / in
artlichen reymen sprächen / Historien / Instrumenten /
Seiten spielen in den lieblichsten farben / vnd gemelden /
in goldt vnd silber / in stein / eisen / holtz vnd dergleichen
abgebildet / geeszet / gesticket vnd entworffen: Also das wo
wir mit allen vnsern sinnen vnd gedanken hin kommen /
haben wir anlas vnd ursach zu Christo zu kommen / Ziel
were hie zu sagen / wie wir durch das gebewe der ganzen
Welt / durch alle geschöpff / Creatur vnd andere woltha-
ten sollen erinnert vnd ermundert werden.

Andere aus-
reizung
zur adacht
vnd glaus-
ben.

Durch das
buch d nar-
tur werden
wir geführ-
ret.

Solches alles haben / wissen vnd hören wir durch
vnsere ganzes leben. Sollen vns demnach mindert auff-
halten / vnd sünden lassen den bey Christo / Busse thun /
den glauben vnd gut gewissen behalten / vnd als auserwels-
te Kinder Gottes vnantstößig / heylig vnd gerecht leben /
Aber der grossen thorheit / es ist niemand balde der solches
achtet / da will sich niemand rechte schicken / Gottes wort /
Sacrament vnd Diener sind nicht allein nichts geacht:

Vnser ges-
büch.

Der mensch-
en thorheit
vñ verach-
tung.

¶ iiii

Sondern

Sondern gar veracht/ vnd hat lauter das ansehen/ als were
langst kein glaube zu Gott mehr in der Menschen hertzen.
Vnd ist freylich die Welt ein widerchristliche/ epicu-
risch gesindlein mit einander worden/ was Christus durch
sein wort redet/ gebeut/ verheißt vnd zusagt/ das ist bey
Ihr umbgekert/ nichts/ vnd ganz veracht/ denn was sich
noch zu weilen mit dem munde Christi rühmet/ So ist
doch der bestand vnd warheit des hertzens vnd glaubens
allermeist im eusserlichen thun vnd leben nicht dabey.

Wo vñwer
die rechte
narren vor
Gott sein.

Darumb wer nun obgenante grosse Narren vnd
thoren kennen vnd finden will/ der darff nicht weit gehen/
es leufft gewißlich die ganze Welt/ Sonderlich ist
deutschland voll/ in allen ortten/ Stedten vnd Dörffern/
Wehe aber hernach der grossen vnd ewigen straff/ wenn
man mit der that vñnd vnwiederbringlichen schaden erfas-
ren müsse/ was mann iho so gar nicht glauben will vñnd
verachtet.

Kirch bleib
et ewig.

Doch weil laut Göttlicher zusag die Kirch/ Got-
tes Volck vnd ein heyliger Samen/ wiewol es ein geringe-
r oberlas sein wird/ bis zum Jüngsten tag bleiben soll.
Vnd ob gleich dem ansehen nach/ ich wenig mit dem nehe
Göttlicher predigt bishero gefangen/ will ich doch auff
Christi wort/ willen vnd befehl/ mein neß auswerffen/
vnd zum einfeltigsten aus dem Euangelio berichten.

Propositio.

Wie noch heut zu tag wir alle vns zu Christo/ sein
Göttliches wort vnd Euangelion zu hören/ gleich mit ges-
wale/ ernst vñnd eiffer dringen sollen in herzhlicher betrach-
tung/ was die vrsachen vnd wichtigkeit sey/ die vns darzu
treiben/ setz machen vnd reizen soll.

Hier werden mittel vnd weg gezeiget/ wie allen
Menschen/ sie sein vnd stecken in was nöten/ vbel vñnd
unglück sie wollen/ kan vnd soll gewis vnd warhafftig ge-
holffen werden.

Bitten

Bitten demnach das Gott durch seinen Geist vns
ser Herz vnd ohren eröffnen / rhüren vnnnd führen wolle
Amen.

Was Christus ist / hat vnd thut / das hören vnnnd
lernen wir immerzu / Solches fasset Paulus in ein kurtz
Summarium 1. Cor: 1. Christus ist vns von Gott ge-
macht zur weisheit / zur gerechtigkeit / zur Heyligung / vñ
zur erlösung / auff das wie geschrieben stehet (Jerem: 9:)
Wer sich rühmet / der rühme sich des Herren.

Solches alles mit einander ergreifen / haben vnd
besitzen wir im waren glauben:

Zwey stücklein gehören zum rechten / seeligmach-
enden glauben 1. Notitia gründliche wissenschaft vnnnd
bericht. 2. Assensus beyfall vnnnd rechtes vnzweiffeligs
vertrauen.

Wie nun aus der predigt vnd verkündigung Göt-
tlichen worts wir haben vnd bekommen eine ware wissen-
schaft / vnd erkenntnis Christi: Also ist es auch des Heyli-
gen Geistes werck vnd gnade / das wir das jenige / was wir
im wort von Christo hören / wissen vnd verstehen / vor
warhafftig / vnd gewiß halten vnd auff vns selbst ziehen vñ
applicirn / daher denn gewisser trost / gedult vnd besten-
digkeit / vnd alle andere gute werck volgen.

Wo aber Gottes wort recht geprediget / vnd gehö-
ret wird / da ist / vnd will auch sein der Heylige Geist mit
seiner gnade vnd erleuchtung / wie vielfeltig aus d' Schrifft
zeugnis vnd exempel sonsten kan dargethan werden.

Hieraus folget nun klar vnd vnwidersprechlich /
das / wer da wil zu Christo kommen / erleucht / bekehrt / heyl-
lig / gerecht vnd ein Chur Kind ewiges lebens werden / der
soll trewlich vnd vleissig hören Gottes wort / daher Paulus
19 gebent Col. 3. Lasset dz wort reichlich vnter euch wonen.

B

Gleich

Gleicher weis wie niemand in ewigkeit nit. hes vor
Christo haben/ond wissen würde/wenn er sein wort nicht
gesand hette/ond uns verkündigen ließe: Also auch ist kan
niemandt zu Christo kommen ond an ihn glauben/ der das
gepredigte wort nicht treulich höret/ der glaube kömpt aus
dem gehöre. Rom: 10.

Gleicherweis wie abermal niemands glauben/et-
was wissen/verstehen/ond sich trösten kan vom ewigen Le-
ben/Seeligkeit/ vnd gnadenwahl aus vnd von ihm selb-
sten: Also hergegen wissen / verstehen vnd glauben solches
alles die da Gottes wort haben vnd hören.

Ist demnach weiter auch gewis / warhafftig vnd
tröstlich / das / wo Gottes wort recht gelert wird / da ist
auch Gottes gnadenwahl vnd beruff zu ar ewigen Leben /
Denn wo Gott sein wort angehen vnd predigen lesset / da
ist ganz gewis / das Gott die Menschen / die es hören /
will selig haben vnd machen / Sintemal durch den glau-
ben an Christum sind wir zum ewigen Leben versehen.

Wir können vnd vermögen aber nicht glauben /
der frey will ist zum guten erstorben? Ey eben darumb giebt
vnd schickt uns Gote sein wort / vnd gebot / das wir denn
dem eusserlichen gehorsam / vnd vleis nachkommen vnd
in alle weg sollen hören / das wir daraus innerlich erleucht /
befert vnd gleubig werden. Denn Gott erfordert den eus-
serlichen gehorsam / zucht vnd disciplin aller dings auch
von den vngleubigen / vnd unbekerten. Darumb er ihnen
verstand / wis vnd vernunfft geben vnd ein natürlich / wie-
wol in diesem standt ein vertustert liecht im Herzen gelas-
sen / Belohnet auch solchen gehorsam vnd erbarkeit hie
zeitlich / vnd strafft hergegen die vppigkeit / freuel / Sünd
vnd ungehorsam an ihnen. Wie nun der Mensch eusser-
lich das wort zwar hören kan vnd soll / So kömpt doch al-
lein die

lein die innerliche bekehrung / vnd erleuchtung des Herzens vom Heyligen Geist.

So warhafftig / trewlich vnd vielfeltig Gott sein wort giebt / lest es so vnd so furmaleu / schreiben / predigen / singen vnd klingen: So warhafftig / trewlich vnd väterslich will er auch / das du das wort hören / bekert / aufferwelet vnd selig werden sollest / Ja so war bistu auch aufferwelet vnd ein Ehr. Kind ewiger seligkeit / Wenn du nur nicht selber mutwillens dich vmb solche gnadenwahl / vnd Seligkeit bringest / in dem du das wort nicht trewlich wilt hören / vnd solche Göttlicher barmherzigkeit verlehene mittel mißbrauchest vnd verachtest / hindan setzest / vnd oben hin ohn allen ernst vnd eiffer nicht warnimbst / daher wird nun Gottes wort genennet ein wort seiner gnaden Act: 20. Dieweil er solches aus gnaden ohn vnser verdienst / wollen vnd leuffen giebt / Ist ein wort der verheissung Rom: 9. dieweil es Gott verheissen hat / daher heist es Gottes will Johan: 6. Sein rath Esai: 53. Sein wolgefallen Eph: 1. dieweil allein dadurch vns Gott bekehren vnd erleuchten will / das wort des Heyls Act: 13. das nicht lehr vnd ohne frucht abgeheth Esai: 55. Ein wort des glaubens Rom: 10. Daher zumereken das Christus spricht Luc: 23. Wie offte hab ich gewolt etc. das ist euch annemen / in deme ich euch mein wort gegeben / vnd selbst geprediget / auff das ihr glaubet vnd selig würdet. Ihr aber habt nicht gewolt / nemlich hören / darumb könnet ihr auch nicht zu mir kommen / glauben vnd Selig werden.

Spricht jemand: warumb hat denn Gott diesen vnd andern Volckern / hin vnd wieder in der Welt sein Wort nicht geben / vnd offenbaret / darumb / weil sie das Wort nicht haben / können sie nicht glauben / vnd demnach Selig werden / werden demnach nicht erwöhlet sein?

B ij

Ob

Ob wol hier auff's richtigst vnd beste kan geantworte
werden/das solches Gottes rechte straffe sey/vnd demnach
nicht auff die vernehmung vnd gnadenwahl zu ziehen/weil sie
zuvor auch in ihrem Landen / Stedten / grenzen Gottes
wort gehabt/ aber nicht hören wollen/ Sondern veracht/
mißbraucht vnd nur erger dabey worden/ hat Gott als ein
Exod:20. eueriger rechter vnd straffer der väter Sünde vnd missethat
an den Kindern/ Solchen vndanck vnd verachtung heims
Kom:1. gesucht vnd gestrafft/ Also das er sein wort von ihnen ge-
2. Tes:2. nommen/ ihnen kreffrige irrthumb an die stadt geschickt/
vnd sie mit blindheit geschlagen.

Darumb erscheinet hieraus wie ein grosse schreck-
liche missethat vnd straff das ist/ wenn Eltern also an ihrer
Kinder vnd nachkommen vnheyl / vnd verdammnis schul-
dig werden. Biewol auch die Kinder/ nachkommen/ vnd
alle Welt nicht ganz können entschuldigt sein/denn ob wol
bey / vnd vnter ihnen Gottes wort nicht ist / vnd gepredie-
get wird/ So ist es doch an andern orten vnd Landen/da-
1. Reg:10. hin sie ziehen vnd alda hören köndten. Wie an der Köni-
2. Chro:9. gin aus Saba / vnd den Weisen aus Morgenland zu
Matth:2. sehen.

Wie nun hierinnen Gottes gerechte / weg vnd ges-
riche/ so wol auch zwar der Menschen thun vnd verbrech-
en vnerforschlich vnd wenigst zubegreifen sind: Also ist
auch dieses die beste/ sicherste antwort hierinnen/ das wir
nicht viel fragen / vnd forschen nach diesem vnd jenem/ in
diesem vnbegreiflichen Artikel/ Sondern nur allein auff
Jer:9. vns selbst / vnd auff Gottes gnedigen beruff vnd gnaden
1 Cor:1. wort sehen/ vnd demselben nachfolgen/vnd vns allein des
Philip:4. Herrn rühmen vnd freuen/ Johann: 20. sagt Petrus zu
Ihesu: Was soll aber dieser etc. Ihesus aber antwortet/
Was gehet es dich an / folge du mir nach: Also sollen wir
nicht

nicht lange hin vnd her in der Welt gaffen vnd forschen/
das vns beydes von den Menschen / vnd Gottes gerechten
gericht verborgen / vnd unbewust ist / Sondern auff vns
selbsten vnd auff Gottes wort vnd gnedigen beruff sehen/
vnd darinnen vns geruhen vnd zu frieden geben.

Wöcht einer weiter sagen / was hat es denn mit dies
sem / vnd jenem vor ein gelegenheit / die mitten im Chris
tenthumb seind / Gottes wort haben vnd hören können/
vnd sind gleichwol ohne glauben / vnd ohne Busse / daher
man sihet ihr heidnisch / Gottlos / viehisch leben? werden
demnach auch nicht zum ewigen leben versehen: Sondern
also schlecht von Gott dahin gegeben vnd verstoßen sein?

Die antwort kan aus bereit gehörter Lehr bald ge
nommen werden / weil ihr viel ja der meiste / vornembste
vnd größte hauff / eben an den orten / da Gottes wort zum
reichlichsten vnd reinsten geprediget wird / dasselbe nicht
rechte hören / Sondern verachten / zum höchsten miß
brauchen / mit füßen treten / dem Heyligen Geist ohne
auffhören wiederstreben / sich nicht straffen vnd regiren las
sen / Ja da sie bereit bekert vnd erleucht gewesen / mutwil
lig wieder ihr gewissen / vnd wieder Gottes erkandten wil
len in Sünde willigen vnd fallen / vnd schiffbruch am glau
ben leiden / Ist nicht wunder / das Gott auch nach seinem
gerechten zorn vnd gericht handt von ihnen zeucht / der
Heilig Geist von ihnen weicht / vnd sie verstockt vnd blind
in ihren Sünden fortfahren / vnd verderben / welches deß
abermal nicht auff Gottes wahl vnd vergebung soll gezo
gen werden / Sondern ist Gottes gericht / vnd nechst dem
Höllischen fener erschrecklichste / höchste straff / wie Chris
tus von den Jüden zeuget Luc: 23. Nun istis vor deinen
augen verborgen.

Desgleichen ist wol auch an keinem gar zuuere
zweifeln

Luc: 23.
Math: 20.

Zweiffeln/in was Irrthumb/Sünde vnnnd blindheit er als
zur straffe in einem Kercker lieget/vnd nachmal nach Gots
tes verborgener erkentnis / vnnnd grosser Barmhertzigkeit/
Durch sonderliche gelegenheit Gottes beuiff vnnnd Wort/
auch wol am letzten Ende höret/sich beuert/vnd wie ande
re/durch Christum Seelig wird/wie die Histori vō Schez
cher vnd Arbeitern im Weinberg neben den Exempeln vnz
zelig vieler Armer / vnnnd am letzten Ende beueter Sün
der bezeuget. Wie man nun hier an keinem gentslich verz
zweiffeln soll: Also ist auch dis fals Gottes verborgen ge
richt nicht zu erforschen / das einer beuert der ander aber
verworffen wird vnd bleibt. Allein das wir alda an Gottes
barmhertzigkeit den höchsten trost vnd den an seiner gerecht
tigkeit die höchste warnung zubetrachten haben.

Es klagen vnd sorgen wol mehrmal andere vnd
sagen/ Ich höre gleichwol Gottes wort/ brauch des heyl
igen Nachtmals vnd wolte mich gern recht vnd ganz bes
kehren gleuben vnd Christlich leben/ Aber die warheit zu
bekennen / ich spüre vnd füle leider das Gottes wort bey
mir nicht fruchten vnd hafften will: Ich kan nicht gleuben/
solchen trost nicht fassen/ vnd sonst wie ich wol sollte vnd
wolt/ mein leben Gottselig führen / müsse mich demnach
bald zu tode engstigen/ bekümmern vnd verzweiffeln/ ich
werde nicht zum ewigen Leben erwehelt vnd versehen sein.

Hie höre antwort du allerliebster Christ / dieses es
ben dieses ist das aller mercklichste vnd gewissest anzeigen/
vnd zeugnis das du ein warer außewelter Christ/ vnnnd
Kind des ewigen Lebens bist / du siehest / fühlest/ empfin
dest deine schwachheit/ blindheit/ vnglauben / deinen vnz
willen vnd deines Hergens grobheit vnd hartigkeit/ vnd
woltest

Welches gleich wol gern das du recht glauben / Gottselig leben / und dich trösten köndest / woher kömpt diese erkenntnis deiner selbst? woher kömpt dieses wollen und dieser streit / und Herzen angst? denn eben von dem Heyligen Geist / der bereit dein Herz gerürt / und das aller seeligste werck der bekehrung in dir angefangen hat.

Das ist die lust und streit des Geistes wider das fleisch Galat: 5. Cap: Und die also getrieben werden / werden vom Heyligen Geist / sind Gottes Kinder / Rom. 8. und Gott der dieses Selige wollen und verlangen in die angefangen / wird auch das volbringen geben und wirken nach seinem wolgefallen Philip: 2. Über dieses heimliche leiden und hohe anfechtung klagen nun David in psalmen und alle Heyligen / und Christus selbst ist in seiner unschuld umb unsere willen in diesem kampff gesteckt / da er am Creuz leidende schreiet: Mein Gott mein Gott warum hastu mich verlassen? da er denn mit solchem leiden / und anfechtung alles was bey uns / bey und vater solchem leiden und kampff mit der verzweiflung / menschlichs und gebrechlichs unterleufft / gebühret und bezahlet hat. Darumb ist das beste das man Gott still halte / er wird uns das zeitliche vnd kleine leiden helfen überwinden / vnd es mit der versuchung also machen / das wirs können ertragen / und die Gottseligen wissen aus der versuchung zu erlösen. Denn ja in dieser Welt kein Engel reines vollkommenes Leben zu ereremen / sondern es bleiben noch die anliebende Sünde / und gebrechen bis in die Gruben / die doch die Gottseligen erkennen / und also darwieder streiten / und die ihnen umb Christi heyligkeit / und vollkommenheit willen nicht zugerechnet / sondern verdeckt vnd vergeben sind.

Dagegen weis und verstehe kein Weltkind und sicherer

B iij.

Epicus

psal: 22.

Math: 27.

Marci 15.

2 Cor: 4.

1 Cor: 10.

2 Pet: 2.

Epicurer nichts von diesem Kampff / wie es nun bey den
busfertigen Menschen ein gutes anzeigen ist einer waren
seligen bekehrung: Also ist solche sicherheit der Weltkinder
ein gemerck / dz sie Geistlos ohne Busse / vñ noch in Sün-
den erödet vnd verblindet sein.

Vnd das man nun in einer Summa recht verstes-
hen vnd wissen möge / wie vnser gnadenwahl vñnd erste
antritt zum ewigē Leben beruhe auff dem rechten hören Göt-
tlichs worts / Können es ihnen E. L. zum einfeltigsten vnd
deutlichsten / nach dem geoffenbarten wort vnd zeugnis /
also einbilden.

Præmissio.

*Prædestina-
tio
&
Reprobatio
determina-
ta.*

Media

Wenn der aller größte Herr in der Welt alda auff
dieser Kanzel stünde / vnd hette vor ihm den ganzen umb-
stand aller Menschen / die noch auff diese Welt kommen
vnd geboren werden / Er kennet auch einen jēlichen in /
vnd auswendig vnd sahe gleich vor augen was ein jedlicher
er were / vnd thun würde bis zu seinem todt / Er wählte
ihm auch aus diesem hauffen ein sonderliche anzahl / die er
zu seinem Reich vnd Herrlichkeit bringen vnd ziehen wolte /
also vnd der gestalt das er nicht absolute schlecht vnd ge-
rade sagte / eben dieser vñnd jener soll von mir angenom-
men / die andern aber verstossen werden: Sondern mach-
et vnd stecket einen zweck / vnd willigte als denn darauff /
das welcher diesen zweck würde ergreifen / vnd denselben
auch erhalten / eben der solte von ihm angenommen / wer
aber solchen gesetzten zweck nicht finden vñ ergreifen wür-
de / solt ohn alles vrtheil verstossen werden. Damit aber
se keiner diesen Herren einer vnfreundlichkeit / vnd partei-
scher ansehung der Personen hette zubeschulden / als ord-
denet er weiter ab vnter diesen hauffen seinen Herold / vnd
andere Diener / die allenthalben verkündigten vnd ausruf-
seten / vnd gleich mit fingern dahin zeigten / wo / vnd wer
dieser

Dieser zweck were? Ja gab ihnen darauff noch einem fuh-
rirer/ vnnnd gleitsman zu/ der sie dahin furet/ das sie diesen
zweck fündten ergreifen / vnnnd erhalten vnter vielen/ vnnnd
grossen gedreng/ hindernissen / vnd anstößen. So aber
etliche hin/ vnd wieder nicht wolten hören/ an vnd auffne-
men/ auch nicht volgen diesen Heroldt/ dienern / vnd fuh-
rirer/ das dieser Herr / entweder solche leut liesse hinhawen/
oder nehme seine diener gar von ihnen / das sie in der irre
diesen zweck nimmer ergreifen/ finden / vnnnd demnach zu
dieses Herren Reich/ Gnad / vnnnd Herrligkeit gelangen/
vnd kommen fündten. Was wolte nun die schuldt sein/
das diese leut verstoßen würden? Trauen niemandt an-
ders/ denn eben dieser Leut selbst: Da angehen/ das dies-
ser Herr bereit zuvor wol gesehen/ welche volgen/ vnd mit
starcker Handt diesen zweck ergreifen/ vnnnd welche unges-
horsam/ vnd an dem zweck sich stossen / vnnnd widerspen-
stig sein würden.

Also gleicher weis meldet/ vnd zeuget die Schrift/ *Sap. i.*
das vns der Allmechtige/ Ewige/ vnd allwissende vnd all- *Rom: 8.*
sehende Gott / vor der Welt Erschaffung zu seinem gna- *Psal: 7.*
denreich erwöhlet vnd versehen hat / nemlich also: *Ephes: 1.*

Christus Ihesus ist der zweck des Heyls/ den er ver- *I.*
ordnet/ Gesezt/ vñ gesand hat/ wer diesen findet/ ergreiffet/
vnd hat ist ein Chür Kindt des Ewigen Lebens.

Die Handt/ damit dieser zweck ergriffen / vnd ges- *II.*
halten wird/ ist der ware glaube.

Der Heroldt dieses Herrn / ist der Sohn Gottes *III.*
auch selbst/ die Dienern sind lehrer vnnnd Prediger / der
fuhrirer vnd gleids man ist der Heylige Geist.

Die hinderungen anstöße / vnnnd widerwerdigkeit *IV.*
sind des Fleisches sin/ vnnnd vernunft / Weltliche lust/ er-
gernis/ vnglaube/ vnd der Teufel etc.

Die

V.

Die vngehorsamen vnd die zu diesem Zweck vnd gnaden nicht kommen/ sind alle die sich hindern vnd auffhalten lassen/ den Herold/ Lehrer vnd Prediger nicht hören/ vnd dem Heiligen Geist widerstreben.

VI.

Matth: 10

24.

Apos: 2.

Die aber Ehr. Kinder ewiger Seeligkeit sein vnd bleiben/ das sind die Gottes wort hören / dem Heiligen Geist gehorsamen/ vnd vnter allen anstößen vnd widerwertigkeit/ bestendig vnd getrew beharren.

Wie nun Gott kein schuld dran hat/ das ihr viel verstoßen werden/ vnd seine gerechtigkeit an ihrer verdammnis offenbar vnd gerühmet wirdt: Also kömpt es her von seiner vberschwenglichen Barmherzigkeit/ das wir außerswelte Kinder/ vnd Erben des Lebens seindt.

Dioweit denn am rechten hören Göttliches worts so viel vnd hoch gelegen/ vnd es vnserm HERN Gott ein solcher vnwandelbarer ernst vnd vorsatz ist/ vns durch sein wort vnd Heiligen Geist zu erleuchten vnd selig zu machen/ wie denn Gott hinwiederumb kein Sünde weniger leiden kan vñ schrecklicher strafft/ den die verachtung seines worts. Sollen wir ermundert vnd klug werden/ Gottes wort also vnd der gestalt zu hören.

I.

Gleich wie hie das Volk mit grossem gedrengel hauffenweis Christum vberfelt/ Gottes wort zu hören/ sollen wir stetiges ohne vnterlas vnd vberdrus / in warer höchster attention vnd andacht / auch Gottes wort hören wo vnd so oft man dasselbige öffentlich predigt Marci 6. vnd anderswo / ist ein solch zugeleufft zu Christo/ das er vñ die Jünger nicht essen können. Matth. 5. Seelig sind die da hungert/ vnd durstet nach der gerechtigkeit / denn sie sollen satt werden. Luc: 11. Seelig sind die Gottes wort hören/ vnd bewahren. Rom: 10. Der glaube kömpt aus dem gehöre.

II.

Nachmal sollen sie das gehörte wort so liederlich

nicht lassen fahren vnd vergessen/ Sondern bey sich erwe-
gen/ ihm nachdencken/ es stetiges vnd vleissig betrachten/
sich daraus trosten vnd bessern. Psal: 1. Wol dem der lust
hat zum gesez des Herren/ vnd redet von seinem gesez tag
vnd nacht/ der ist wie ein baum gepflanzt an den wasser-
becken / der seine frucht bringet zu seiner zeit / vnd seine
bletter verwelcken nicht / vnd was er macht das gereht wol/
Wie im alten Testamant allein die wiederkewende thier Leuit: 11.
Deut: 14.
Luc: 8.
vor rein vnd gut gehalten worden: Also sind auch das als
sein gute vnd rechte Christen / die Gottes wort / die rechte
speis wiederkewen / das ist / stet vnd offte bey sich erwegen
vnd betrachten.

Weiter höret man Gottes wort fruchtbarlich / weiß
man ware Busse thut / das Leben daraus bessert / den glaus
ben stercket / vnd in aller Gottseligkeit zunimpt / Matth: 3.
Thut rechtschaffene frucht der Busse / Marc: 1 Das reich
Gottes ist erbey kommen / thut Busse vnd gleubet an das
Euangelium.

Soll Gottes wort bey vns recht fruchten vnd bes-
stet sein / Sollen wir auch viel vnd offte brauchen des
Heyligen Nachtmals Christi / daraus vnser glaube ver-
sichert / die gaben des Heyligen Geistes vermehret / vnd
wir zum ewigen Leben verwahret werden / Luc: 22. Das
thut zu meinem gedechtnis. 1 Cor: 11. So offte ihr von
diesem brod esset vnd von diesem Kelch trincket / Solt ihr
des Herrn todt verkündigen bis er komme.

Es soll auch hierzu kommen jeder zeit / ein rechtes
gebet vnd ware anruffung / das vns Gott seinen Geist ges-
ben wolle / der vns in alle warheit leite / vnd den rechten
verstand seines worts weise / Luc: 11. Wie vielmehr wird
der Vater im Himmel den Heyligen Geist gebē / denen die
ihn bitten 1 Cor: 12. Den niemād kan Ihesum einen Herrē
heissen ohn den Heylige Geist / Luc: 18. Beten die Apostels

Stercke vns den glauben/ Luc: 18. Man soll allzeit beten
vnd nicht laß werden etc.

VI.

Sollen wir auch fliehen vnd meiden was vns an
dem gehör des worts hindert vnd abhelt vnd vns darzu
dringen/ wie hernach volget.

VII.

Entlich sollen wir auch darzu rathen/ fördern vnd
helffen/das Gottes wort recht gehört/ besucht/gebraucht
erhalten/vnd fort gepflantzet werde/welches den fornemlich
Eltern/ Obigkeit vnd Prediger angehet.

I.

Das die Kinderlein so bald nach der leiblichen ges-
burt zur heyligen Tauffe gebracht/ Christo zugetragen/
seinem Reich einverleibet/ vnd mit dem Heyligen Geist
begabet werden/ damit sie volgendes im leben auch desto
ehr hören vnd lernen mögen.

III.

II.

Desgleichen das Kinderlein so bald in der Jugend
mit vleis von den Eltern zu Gottes wort vnd furcht gewe-
net vnd angeleitet werden/ das sie ihnen vorbeten/ vnd
denn auch in die Schul vnd Kinderlehr schicken/ Welche
Eltern das nicht thun/ begehen ein grewliche Sünde/ in
dem sie ihr ampt nicht bedencken/ vnd an der Kinder vns
heyl schuldig werden.

VI.

III.

Luc: 14.

Sol ihnen mit guten exempeln von Eltern/ den
vnterthanen von der Obigkeit/ den zuhörern von Seel-
sorgern/ vorgangen/ vnd sie mit stetigem vermahnen vnd
antreiben gleich zu Gottes wort vnd Abendmal nötigen.

IV.

Sol von allen miteinander vleis angewand wer-
den/das alle irrthumb/falsche Lehre ergernis verhütet vnd
abgeschaffet werden/ denn freylich wo Gottes wort nicht
rein gelert wird vnd irrthumb ein reissen/da kan auch Got-
tes wort nicht recht gehört werden/ es volgen vnzählich
viel hinderung/ darauff es denn auch der Teuffel spielet.

V.

Müssen auch jeder zeit rechte/reine/getreue/vleis-
sige vnd



fige vnd eifferrige Prediger beruffen / auff gestelt / geschickt /
vnd mit notdürfftiger gebürlicher besoldung vnterhalten /
vnd disfalls aller mangel verhütet werden.

Gehören auch darzu alle Schulen / das alda rechte
tächttige Lehrer bestet / vnd sonst arme schüler / vnd stu-
denten erhalten / verlegt vnd gefördert werden.

Neben dem sollen auch alle öffentliche Kirchen
vnd schulgebewte im bewlichen wesen gehalten / zingerich-
tet / vnd verbessere werden das alda mit lust vnd ohne hin-
derung Gottes wort möge gelehret vnd gehöret werden /
vnd unsere gönstige Löbliche Herrn ein Ehrenvester Raht
wenn sie also fortfahren / wie sie angefangen / werden sich
disfalls rhümlichen verdienen / and wird ihnen solch auffge-
wandte vnkosten Gott zum reichsten wieder erstatten vnd
darlegen.

Hierinnen sollen auch zumal die Lehrer vnd Seels-
sorger vleissig vnd vorsichtig sein / in allen ihren predigten
dahin arbeiten / damit allenthalben etliche mögen erbawet
vnd wolgerüret entweder getrüestet oder zur Busse angetrie-
ben werden / vnd obwol ihr viel darüber sawer sehen / vnd
sich vnlustig machen / Sollen sie so bald nicht erschrecken
vnd ablassen / Sondern darfür achten das ein gut anzei-
gen sey / wenn sie dermassen getroffen worden / denn sie
dadurch können bekert / oder so sie also fortfahren / sind eben
sie vnd nicht Lehrer vnd Prediger schuldig an ihrer ver-
damnis.

Wenn wir nun obgehörter weis den rechten grund
wichtig vnd notwendigkeit form vnd gelegenheit des rech-
ten hören Göttlichs worts betrachten / vnd selbigen ein je-
der vor sich / vnd in seinem Ampt / vnd stande nachsehen /
Hilff du trewer Gott wie solt es so viel besser vnd herrlich-
er mit vns vnd vnter vns stehen / Da würden traum die

VI.

VII.

VIII.

IV
IV
sal grösser/der hauff dicker/ vnd menniglich vleissiger sein
in der Kirchen/ da würden der predigten nicht zuviel noch
derselben keine zu lang sein/ da würde all zeitlich/ vnd son-
derlich all ewiges vnheyl vnd verderben der Seelen verhü-
tet werden.

Weiter belangend die vrsachen /die vns neben dem
abgehörten grund zum vleissigen hören des worts treiben
vnd auffbringen sollen/beruhen selbige/auff diesen zweyen
puncten. Nemlich in vermeidung alles vbel vnd hergegen
in vorgewisserung alles guten

Zweyerley vbel vnd vnheyl entstehet daraus/wenn
man Gottes wort nicht mit stetem ernst vnd vleis höret/
zeitliches vnd ewiges.

I.
III
Ein verechter Göttlichs worts vnd Diener kan
niemmer gedeien/ ob er schon mag reich sein/ so ist es doch
gewislich ein fluch / gehets ihm wol/so weret es doch ein
kleine zeit/ ist er sicher so sündiget er nur desto mehr / gehet
es ihm also hinaus auff dieser Welt/ so ist er gewis des
Teufels/ wiewol solche verechter auch gemeiniglich Got-
tes schreckliche straff entlich noch in dieser Welt trifft. Wie
einem wort: Alle straffe/ plage / vbel / vnglück / Jammer
vnd noi kömpt aus diesem loch/ dz man Gottes wort nicht
höret/ vnd so liederlich vnd miteinander leichtfertig helet.
Die Welt ist solcher exempel voll / die Welt macht sich
auch reiff hier durch zu allem vnglück vnd entlichem vnter-
gang/ das ist gewis.

II.
Auff diese verachtung volget gerade zu/der ewig
vnd ander todt/ weil solche Leut nicht mit dem brod/ vnd
wort des Lebens / mit öl vnd lampen zur mitternacht ver-
sehen sind/ der vngleubigen theil wird sein in dem feurigen
pfuel Apoc: 21. Da werden die Narren auffwachen/die
hi: so vngelassen vnd trozig/ so hönisch vnd heuchlisch
gewesen

gewesen/ vnd aller erst mit ihrem schaden/ doch alzulang
geharret/ klug werden. Wer demnach ohren hat zu hören
der höre. Das gute vnd die herrlichkeit so aus dem gehöre
volget/ ist nicht zubegreifen noch aus zusprechen.

I. Die in diesem leben allerley seggen / glück vnd wol-
fart am Leib/ am Leben/ zu hause vnd hoffe/ an ehr/ hab/
vnd gut/ vnd was man ist/ hat/ vnd vermag/ das ist gebe- *Deut; 28.*
nedriet vnd gesegnet von Gott. Darumb werffe ein ih-
licher in seinem beruff vnd gewerb sein netze aus/ auff das
wort des Herren/ das ist/ Trachte nach dem Reich Gottes *Matth: 6.*
vnd nach seiner gerechtigkeit/ so wird ihm das andere alles
zufallen. Das were nun ein guter rath reich vnd gros zu
werden/ wenn nur Leut weren die da volgen wolten.

Ist irgend ein grosser Herr der rath/ hülff/ Sieg/
glück/ reichthumb/ gelt/ vnd anders bedarff/ der höre vleis-
sig Gottes wort.

Ist irgend ein Stadt / ein Regiment / ein ampt/
das wiederum in gut auffnehmen / vnd wolstand zu ges-
deilichen reichthumb kommē will/ so höre man Gottes wort.

Ist irgend ein kauff vnd handelsman/ ein Bürger/
Bawer/ ein handwerker/ ein diener/ Knecht vnd Magd/
ein armer Weise vnd wer er nur sein mag/ der hülff/ glück/
ehr/ gut vnd alle wolffart bedarff vnd begert/ der höre Got-
tes wort. Dieweil man aber wenig/ d meiste theil gar nicht
diesem rath/ diesem wort vñ Göttlicher verheischung glau-
bet/ volget vnd nachkömmet/ So müsse auch meist theils
hindersich den krebsgang gehen/ zu nicht vnd allenthalben
lauter betteley werden/ wie klug / weis vnd vorsichtig man
es auch beginnet vnd ansieht. Das einer aber sagen möchte *Einrede vñ*
Ja die aufferwelten/ die allermeist Gottes wort hören/ sind *weltkinder.*
wol die armen vnd unglückseligsten in der Welt / wie
kan denn das sein / das man vom hören auch allerdings
zeitliche wolffart solte haben? *Ne.*

Neben deme das auch den aufferwelten/ Christgleubigen
vnter dem Creuz armut/ vnd elend gar wol ist/ dieweil sie an
glauben vnd Gottseeligkeit reich sein/ vnd nicht allein auff
das zeitliche gaffen/ So ist gewis/ das wen sie auch selbst
Gottes wort also hörten vnd nach demselben sich durch
aus verhielten/ das sie glückselig in der Welt weren/ weil
es ihnen aber in dieser leibes vnd lebens schwachheit nicht
ganz möglich also zu hören vnd gehorsamen/ müsse sie
vnsere Gott durch Creuz vnd ruten in der furcht vnd gehor-
sam erhalten/ da ihnen doch auch/ wie gemelt/ wol ist.

Andere ein/
rede.

Es sey wie ihm wolle/ spricht ein welt vnd geltstich-
es Hertz/ man höre wie man wolle/ so kan dauon niemand
satt werden/ wo man nicht auch vleissig arbeit/ haushelt/
händler treibt: Antwort. Das ist ein ganz verkerte rede/
Gottes wort hebt arbeit/ vleis/ haushalten/ handeln etc.
nicht auff/ Sondern billiget vnd bestetiget solches viel
mehr. Allein das man die Ochsen nicht hindern pflug
spanne vnd arbeit/ sorgfeligkeit/ mühe vnd vleis dem
wort vorzihe/ vnd wol also vorzihe/ das dadurch nicht al-
lein das wort nachgesetzt/ Sondern gar veracht vnd ver-
warloset werde. Es müsse in diesem leben beydes beysam-
men/ vnd ein jedes an seinem ort sein.

II.

1. Tim: 4.

Es ist aber drum nicht vmb sonst wenn man ste-
tig vnd vleissig Gottes wort hören/ vnd arbeiten müsse hie
in diesem Leben/ wie etwan Leute vermeinen die nur auff
das eusserliche/ vnd was den bauch vnd augen füllet/ sehen.
Denn eben deme das arbeit vnd alles vornemen gesegnet
vnd geheyliget wird durch das wort Gottes/ also volgen
daraus vnzählige herrliche nutzbarkeiten/ gaben vnd sache
vmb welcher willen sich keiner der Welt/ vnd was in der
Welt ist/ wenigst verzeihen solte/ als da seind ware be-
kennung/ warer glaube an Christum/ hoffnung/ vnd vergewis-
serung

serung des Ewigen Lebens. Ware Gottseligkeit/ vnd allerhand
Christliche gute Werck vnd Tugende/ Summa/ also ist vnd
wird man ein auserwöltes Kindt Ewiges Lebens. Darumb
wer Ohren hat zu hören/ der höre.

Darauff denn zum letzten gewislich volget die völlige
posses/ vnd Erbschafft des verheissenen/ vnd gehofften Bas
terlandts/ vnd am Jüngsten Tag die freudenreiche Aufferstes
hung des Leibes/ die Liebreiche zusammen kunfft d' Seelen vñ
Leibes/ Herrliche verklarung/ vnausprechliche freud/ vnd Ges
ligkeit vñnd alles was vns hier im Wort vom Ewigen Leben
verheissen wird/ vnd wir im glauben bereit haben vnd besitzen/
Das wird da kommen/ vnd volgen/ grösser vñnd Reicher denn
wir szo verstehen können. 1. Cor. 2. Sage Paulus aus dem
Propheten Esaia 64. Das kein Auge gesehen hat/ vñnd kein
Ohr gehöret hat / vñnd in keines Menschen herten kommen
ist/ Das Gott bereitet hat denen die ihn lieben / 1. Johan. 3.
meine lieben/ wir sind nun Gottes Kinder / vnd ist noch nicht
erschienen/ was wir sein werden / wir wissen aber / wenn es
erscheinen wird/ das wir jm gleich sein werden/ denn wir wer
den in sehen wie er ist/ darumb wer ohren hat zu hören der höre.

Entlich soll vns wol allermeist auch dieses reizen / vnd
reiben / Gottes Wort zu hören / vñnd dadurch zu Christo
zukommen/ nemlich die grosse/ mechtige vielfeltige/ vnd vnze
lige hindernissen/ anstösse/ vñnd abhaltung / da wir vns denn
freylich zu Christo müssen dringen / vñnd den feinden gleich
durch die Spiesse lauffen/ wenn wir zu ihm kommen/ vnd sein
Wort hören sollen / da seind auff diesem weg alle feinde/ die
vns alle Spiesse/ ond spizen bieten/ vnser eigen Fleisch/ vñnd
vernunft/ die Welt/ der Teufel/ vnd der Todt.

Vnser Fleisch/ vnd vernunft seind der erste man der im
Sturm wieder vns streitet: Da ist Blindheit/ vnwill/ vnlust/
trägheit/ Sicherheit/ zweiffel/ verachtung/ argwon / vnglau
ben / heutzkeit / vermeinte Weisheit vñnd grosse flugheit in
Geist

Anderer ver
sachen Gots
tes wort zu
hören.

I.

Geistlichen Sachen/has vnd neide wieder Lehrer vnd Predi-
ger/Sorg der narung/Geiz/böser vorsatz/Kachgiz/vneinig-
keit/vnd alle Sünde wieder die Zehen gebot etc.

II. Darzu hilfft nun die Welt in viel weg mit irem Exem-
peln/ergernis/vnd gewalt/die liegt im argen bis vber die Oh-
ren/in allen oberzelten Sünden / der ist das Predige Ampt.
NB viel zu gering /schlecht / vnnnd verechlich dem cusserlichen an-
sehen nach/weil sie von der innerlichen krafft vnnnd Herrligkeit
nichts weis. Da ist ihr falscher/gleissender : dem Fleisch/vnd
vernunfft sehr anmuthiger Gottesdienst / wollust / Hoffart /
Reichthumb/herrligkeit/ansehen/gewalt/verfolgung/Mord
vnd Bludt vber die es mit ihr nicht halten/vntrew /vnnnd vn-
lust zu alle dem das dem rechten gehöre / des Wort wie dro-
ben erzelt/ anhengig ist.

III. Wie nun solches alles vom Teufel herkömpt/also fey-
ert er fort nicht/sondern gehet tag vnnnd nacht herum / vnnnd
suchet welchen er möge verschlingen / vnd weil er gar wol weis
a. Pet: 5. das alles am hören Göttlichen Worts gelegen/vnnnd das wir
allein durch dasselbe Seelig werden/richtet er sich zum gewal-
tigsten wieder das Wort/vnd meinet ja wol/wenn das Wort
hinweg were/wolte er ein gewonnen Spiel haben/daher See-
het er so viel bösen Samen aus/vnd richtet falsche lehr zu/da-
rumb wenigst wunder / das so viel streit / vneinigheit / Irr-
thumb/vnd trennung kömpt/neben deme /das er vmb vns her
ist/vnd es vns so vnd so zupfeiffet/ vorhelt / leicht vnnnd Süsse
macht/das wir das Wort/verlassen/ vnd nicht achten. Wie
er sich den dieser Abenthewer im Paradis auch gebraucht / da
er woll gewust/das er vnser gros Eltern nicht Ehe zufall brin-
gen köndte/denn wenn er sie zuuerachtung Göttlichen Worts
vnd Gebots bringen würde.

IV. Denn letztlich jagt vns auch der Tode ein trefflich schre-
cken/förcht /vnd zweiffel ein/weil er alles hin frist/vnnnd auff-
reumbt/ vnd noch keiner wiederkommen aus dem Tode ver-
meint

meinetes sey alles nichts was mā vns von Auferstehung vnd dem Ewigen leben Prediget/ vnd sey demnach vergebens/ das man lang viel Gottes Wort hören / vnd vmb dasselben willen etwas thun sollen.

O wie wist
hie so mäch
epicentrisch
hertz ges
troffen.

Nun durch diese vier Haupt feinde/ deren ein jder ein so mechtig Heer/ vnd gewalt wieder vns führet/ müssen wir vns in diesem Leben schlagen/ vnd reissen/ darumb heist es wol das wir vns zu Christo bringē müssen/ das vnser Leben/ ein Krieg/ Streit/ vnd kampff sey: das wir vnser Seeligkeit mit forcht/ vnd zittern warnemen sollen/ das der weg schnell/ vnd die pforte enge sey/ so zum leben führet/ das wir zusehen wer da stehet das er nicht falle/ das wir beständig vnd getrew bis ans Ende verharren / das wir vns Leyden / überwinden / vnd durch viel Creuz vnd Trübsal eingehen in das Himmelreich.

Phil: 2.

Matth: 7.

1. Cor: 10.

2. Tim: 4.

Apo: 2.

Aclor: 14.

Das soll nun ist vnd allezeit ein islicher zum treulichsten warnemen/ vnd betrachten / vnd sich so durch sicherheit vnd anders nicht lassen betriegen / wie Apoc: 3. geschrieben: Du sprichst/ Ich bin Reich vnd gar Satt / vnd darff nichts/ vnd weisest nicht das du bist elendt/ vnd Ziemerlich / Arm / Blindt/ vnd blos. Ich rathe dir/ das du Goldt von mir kaufest/ das mit Feuer durchleutert ist/ das du Reich werdest/ vnd weisse Kleider/ das du dich anhuest/ vnd nicht offenbar werde/ die schande deiner blösse/ vnd Salbe deine Augen mit salbe/ das du sehen mögest. Ach/ Gott der vns besser/ denn wir kenne/ warnet/ vnd rahet vns so treulich / das Goldt ist sein Wort/ vnd der glaub. Dem Goldt gehet im Feuer nichts ab: Also das Wort ist beständig ganz/ vnd gewis/ Psalm. 12. 19. Das Goldt wird nur im Feuer reiner/ vnd Heller: Also der Glaube im Ofen des elends/ das ist des Creuzes. Weisse Kleider sind alle gute Werck vnd Tugende / so aus wahren Glauben geschehen / daher sind in der Schrift Nacket vnd blos die ohne gute Werck vnd fruchte des glaubens sind/ salbe ist des Heyligen Geistes erleuchtung. Zu solchem allen kom

Esai: 48.

Matth: 23.

D ij

men

...
...
...
...

men wir vmb sonst/allein das wir nur dz Wort hören. Esa. 55
Darumb wers jzo nicht betrachten/vnd glauben wil/der
wird mirs vnd allen trewen cristen/ Seelsorgern am Jüng-
sten Tag vor Christi Richterstul vnd dem gansen vmbstande
aller Welt zeugnis geben/vnd bekennen müssen/ das alles als
hier am hören Gottes Worts gelegen gewesen/vnd das nichts
so wichtig/ vnd gros: So herrlich vnd beschwerlich sey/es
treffe gleich an/ Leib vnd Leben/Ehr vnd gut/vnd alles was
jimmer sein mag: So ist es doch durchaus noch nicht genuga-
sam vrsach/das vns im wenigsten von Gottes Wort hette sol-
len abhalten vnd hindern/das ist gewis/wenn sich gleich des-
sen alle Welt nicht wil bereden lassen/ Nun hienon genug.

Eph: 1.

Gott der Barmherzigkeit/ vnd warheit/der vns sein
Wort so lang vnd Reichlich geben/der wol sich vnser / Not/
Jammers/vnd elends erbarmen/sein Wort lenger vnd jma-
mer zu erhalten/aller wiederwertigkeit vnd hinderung mechtig-
lich stewart/ vns erleuchtete Augen vnser verstandnis ge-
ben/das gute werck so er in vns angefangen/ vollfüren/ vnser
Herzen vnd Ohren jderzeit rhüren/vnd füren/rechte andacht
ernst/lust vnd lieb zu seinem Wort vns verleihen / freffügen/
gründen/volbereiten/vnd in dieser letzten/ weilwertigen zeit/
vnd Welt bis ans Ende bestendig vnd getrew erhalten/
vnd Ewig Seelig machen/ durch seinen Heylig-
en Geist/vmb Christi des Herren wil-
len/Hochgelobet in Ewigkeit

A M E N.

o Homo qualis eras, sis quantus, quisq; futurus
Ac memor expendas unde quid cad quid habes
Nullus eras, tam magna tenes, DEus omnia donat
Per Christum, credas, gratia mera fuit.
Audi, crede pie, pete semper, vita perennis
Sit pietas, constans perge beatus eris.

N. P.

in mibi qd Vita est sine Verbi Reg 133 m
luntine? More est.



50 A 10/e,35
AB 50 A 10/e,35

ULB Halle

3

003 077 42X





Erster Antritt/vnd eingang zum
Christlichen/vnd ewigen Leben.

Von Gott beschloß sen/vnnd Offenbaret/

Dessen Summa ist:

Das man Gottes Wort hören/
vnd bewahren soll.

Idermenniglich ganz nötig/vnd heil-
sam Geprediget:

Von Nicolao Polanto H. Schrifft
Doctore in Eger/

Den Fünfften Sonntag nach Trinitatis
Anno Clj. Ij. XCl.

Johan: 12. Cap.

Wer mich veracht/vnd nimbt meine Wort
nicht auff/der hat schon der ihn richtet/das
Wort/welches ich geredt habe/das wird in
Richten am Jüngsten Tag.

E S A I E 42. Cap:

Man prediget wol viel/Aber sie haltens nicht/man sagt
ihnen gnug/Aber sie wollens nicht hören.

Gedruckt zu Thema/durch Doe
nat Nichtzenhan.

